



UNIVERSITÄTS-  
BIBLIOTHEK  
PADERBORN

**Poesis Sacra Sive Vitae, Mortis, Et Resurrectionis  
Salvatoris Nostri Jesu Christi Historia**

**Hermanni, Joachim Heinrich von**

**Hildesii, 1743**

**VD18 10904743**

Imò. Patrum ex Limbo per Christum facta liberatio.

---

[urn:nbn:de:hbz:466:1-68828](https://nbn-resolving.org/urn:nbn:de:hbz:466:1-68828)

Principe terrarum, laqueos & vincula passus  
 Circumiiit. Pro te contemptu plenus, iniquum  
 Judicium subiit. Pro te sua terga flagellis  
 Exhibuit. Pro te spinarum morsibus alnam  
 Exposuit frontem. Pro te crucis arbore pressus  
 Inter latrones perrexit ad ardua montis.  
 Pro te, quantus amor! crucifixus, mortuus, hasta  
 Transfossus; demum sub dura rupe sepultus.



# POESEOS SACRÆ

## PARS QUINTA,

### IN QUA POEMATE ASCETICO REPRÆSENTATUR.

1mò. Patrum ex Limbo per Christum facta liberatio.	lapidatio.
2dò. Ejusdem resurrectio.	7mò. Sancti Pauli conversio.
3tio. Apparitio Discipulis aliquoties facta.	8vò. S. Petri informatio rati- conversationis cum gentilibus eidem cœlitus facta.
4to. Ascensio ejus ad Cœlos.	9nò Divisio Apostolorum, &
5to. Missio Spiritus sancti.	10mò Beatissimæ Virginis in Cœ- lum assumptio.
6to. Sancti Stephani protomartyris	

## POESEOS SACRÆ ET PARTIS QUINTÆ INDUCTIO PRIMA.

S. PAULUS I. CORINTH. CAP. 15.

**C**hristus resurrexit à mortuis primitiæ dormientium: quoniam  
 nam quidem per hominem mors; & per hominem  
 resurrectio mortuorum. Et sicut in Adam omnes mortuificati  
 ita & in Christo vivificabuntur. Unusquisque autem in  
 ordine: primitiæ Christus; deinde ii, qui sunt Christi.  
 in adventu ejus crediderunt, &c.

S. PAULUS AD EPHESIOS CAP. 4.

**A**scendens in altum captivam duxit captivitatem;

ona hominibus. Quòd autem ascendit, quid est, nisi quia descendit primùm in inferiores partes Terræ? qui descendit, ipse est & qui ascendit super omnes Cœlos, ut implet omnia, &c.

## SYNOPSIS.

*Dominus & Salvator noster Jesus Christus sub conspectu urbis Hierosolyma in crucis patibulo dolorosè mortuus, quoad sanctissimam animam suam (cui, sicut & corpori, Deitas mansi indivisibiliter unita) descendit ad Limbum; & inde Patriarcharum, Prophetarum, aliorumque Sanctorum animas gloriose liberat.*

Ploratum fatis est! oculos absterge Maria;  
 Ponite singultum Matres; dimittite curas  
 Discipuli: luctum finita tragœdia clausit.  
 Sub pedibus timor est, sublataque causa gemendi:  
 Christus enim mortis trajecto gurgite, tutum  
 Appulit in portum: Mors hæc, victoria dici  
 lure potest. Primos insultus sustinet atri  
 Dæmonis Imperium. Res admiranda! soluti  
 Post sua fata ruunt manes in prælia: linguis  
 Parcite vaniloqui; sacro mens turgida zelo,  
 Æstuat immensos Christi memorare triumphos.  
 Est locus Inferni tenebris conterminus (ætas  
 Prisca vocat Limbum) nullis infestus Averni  
 Ignibus, aut aliis Erebi cruciatibus; una  
 Numinis æterni desit præsentia: mortis  
 Author Adam, multique Patres hoc carcere clausi,  
 Principis adventum, qui rumpat vincula, multis  
 Millibus annorum rogitant. Festinat ad illos  
 Plena Deo, Domini pars immortalis; in alto  
 Calmine constituens rubicunda trophæa salutis.  
 Sic expugnatis inimici mœnibus heros  
 In portis vallisque locat vexilla, priusquam  
 Ad spoliolum pavidam descendat victor in urbem.

R 4

Fit

Fit fragor in specubus squalentibus ; omnia veritas  
 Insolitus rapidusque pavor : stat Rector hiantis  
 Attonitæque Stygis, cinctus latus omne ministris  
 Horrorum ; Beemoth trucibus fera bellua formis  
 Atque Leviathan, Satanas, Mammónque dolosus  
 Et simul innumeris immania spectra figuris  
 Stant circum ; metuuntq; novis gravibusq; ruinis  
 Tartara subverti, vel per nova prælia Cælum  
 Cum Styge luctari : sub quo terrore refulget  
 Calcator Colubri, Cœlesti luce coruscus.  
 Augetur fulgore pavor ; Divinæque virtus  
 Pellit in abstrusos specuum fera monstra recessus  
 Ex quibus obscuri gurgustia fumida regni  
 Implentur fonitu ; damnatos obruit horror ;  
 Pœnarumque truci gemitu confunditur ordo.  
 Non tali fremitu resonat sub frigore rupes  
 Millenis ululata lupis ; non clausa sub antris  
 Ventorum rabies ; non sæva tonitrua mota (nes  
 Cum fremitu terræ : reprobos cadit horror in omni  
 Quantus in Inferno pavor & trepidatio ; tanta  
 In Limbo Patrum regnabant gaudia : summè  
 Gaudebat primævus Adam ; gaudebat & Eva  
 Prima parens. Devotus Abel sub Numinis ara  
 Olim fraterni livoris victima, lætâ  
 Voce reposcebat meritorum præmia. Canus  
 Ille Mathusalem, quo non longævior ullus  
 Egit in humanis, Herois amabile Numen  
 Lætus adorabat. Noë servatus in arca,  
 Iustitiæ cultor, post tam miserabile Mundi  
 Naufragium, Patrum tenebris ascriptus, ovabat  
 Excellens Abraham, Superis offerre paratus  
 Unigenam sobolem, vetulâ cum conjugè Sarâ  
 Ridebat. Tribuum duodenis prolibus olim

Author

Author, & Angelico clarus Iuētamine Iacob,  
 Inter mille Patres, & millia plura nepotum,  
 Festa triumphali celebrabat iubilæ plausu.  
 Divisor pelagi Moses, Aarónque sacerdos  
 Pleni lætitiâ, non ad simulacra iuveni,  
 Sed circum Christi victoris amabile lumen  
 Ducebant hilares hilari cum gente choreas.  
 Josua magnanimus, velocia sidera Solis  
 Et Lunæ tardare potens, & ab ubere Cœlo  
 Oblatus Samuel quoque lætabantur: amato  
 Cum Ionatha David, Goliathi victor, amœno  
 Carmine salvifici peragebant festa trophæi.  
 Calvus Elisæus, mirus sanctusque Propheta,  
 Cum Christo Domino proficisci lætus auebat.  
 Religionis amans Rex victor Iosaphat, hostes  
 Prosterrente Deo; post mortem ductus ad Orci  
 Limina, cum Patribus Christo veniente canebat,  
 Rex pius Ezechias decretæ tempora mortis  
 Protrahit assiduis precibus; Solisque regressum  
 In signum sanandus habet: modò cuncta morarum  
 Vincula disrumpi, Domino sociatus anhelat.  
 Gestit Esajas Divinus præco, Manassis  
 Ex jussu quondam ferrâ dissectus; itémque  
 Ieremias querulus Vates, ac triste minatus  
 Excidium Solymæ: nunc summâ plenus uterque  
 Lætitiâ, Dominum, de quo magnalia pridem  
 Tanta prophetârant, redimitum Sole videbant.  
 In mira quondam conspexit imagine Buzi  
 Filius Ezechiel, quâ sit ratione futurum,  
 Ut reddat Dominus defunctis munera vitæ:  
 Iam videt, in cuius sacro nomine surgant  
 Defuncti, spectâtque Patres, ex carcere Limbi  
 Emissos tandem, Cœlesti luce beari.

R 5

Ido-

Idolo Belis, Daniel, magnoque dracone  
 Destructis, quondam commoti turbine vulgi  
 Raptus in horrificum plenumq; leonibus antrum,  
 Iam salvatus ovat. Pariter sua gaudia produunt  
 Baruch, Oseas, Habacuc, Aggæus, & Amos,  
 Atque Nahum, Abdias, Michæas, & Sophonias;  
 Cùmque Malachiâ Zacharias jubila fundunt.  
 Applaudit Ioël Phatuelis natus: Jonas  
 Absorptus monstro pelagi, miroque refusus  
 Ad littus fato, meliori fortis honore  
 Exemptus tenebris, hodiernâ luce triumphat,  
 Tobias senior, cui stercus hirundinis usum  
 Luminis abstulerat, Cœlesti lumine plenus  
 Iubilat, optatum tempus venisse salutis:  
 Junior, Angelico servatus Achate, parenti  
 Congaudet, lætusque parat super astra levare.  
 Gens Machabæorum sacri mera fulmina belli  
 Exultant, Erebi cæso Nicanore, pacem  
 Illucere sibi, metamque venire malorum.  
 Decrepitus Simeon, qui nondum carne solutus  
 Infantem Dominum cupidis gestaverat ulnis,  
 Subsultat; congaudet ei vetus Anna piarum(gum)  
 Gemma nitens anuum, veterumq; pedisequa le-  
 Dic mihi iuste senex Ioachim, dic conjugem iustam  
 Digna senex conjux, matrum lux nobilis Anna  
 Salvatoris avi, si spectem sanguinis ortum;  
 Quo desiderio flagrâstis, dicite, quando  
 Vidistis vestrum tantâ sub luce Nepotem?  
 Omnia plausus erant, festivaque gaudia totum  
 Implebant Limbum; sed in his(nihil addere ver-  
 Molior) Infantes teneros, quos dirus atrocis  
 Herodis gladius patriis adjunxerat umbris,  
 Eminuisse reor, Nunquid bene comparo Iesum  
 Patri,

Patri, quem variis onerata negotia curis  
 Detinuere diu peregrè, cui fortè reverso  
 Fertur in occursum natorum blanda supellex?  
 Ora paterna premunt; innectunt colla lacertis;  
 Basia dant manibus, patriisque favoribus aucti  
 Sunt hilares, lætisque domum clamoribus implent  
 Infantes animæ. Solymis, ubi nostra salutis  
 Commoda promovit, puerorum sanctus amator,  
 Ut Pater assiduus fidusque revertitur; ite  
 Eius in amplexum pueri! duc agmina, fili  
 Davidis Ioseph, Domini Nutritie: signa  
 Zacharides præfer, Christi Præcursor, eremi  
 Vox austera, Patrum Primas; cui iudice Christo,  
 Nulla parem meritis enixa est fœmina partum:  
 Plaude, quod ex odio meretricis nuper atroci  
 Herodis Regis dederis tua guttura ferro!  
 Accipe mercedem, cape præmia digna labore.  
 Nobilis Agnus adest, qui Mundi crimina tollit,  
 Cœlorumque fores aperit: bona nuntia! Mundo  
 Expectata dies! en prima revertitur ætas:  
 Auditote, Patres, Dominum sua verba sonantem:  
 Dilecti Patres, ex quorum sanguine carnem  
 Virgineo mediante sinu suscepimus, ecce  
 Appropero, Colubri contrito vertice, plenos  
 Promeritis vobis primævæ fortis honores!  
 Hoc feror instanti, quo solvor corpore, vestri  
 Tactus amore, feræ per opaca silentia mortis.  
 Huc trahor! huc rapior! mors fortis; fortior illa  
 Est Divinus amor: celeres hic addidit alas.  
 Fumat adhuc Solymis propè mœnia victima nostri  
 Corporis, & calidum stat adhuc in vulnere tabum;  
 Iusta per hoc Cœli deferbuit ira; revixit  
 Gratia; parta salus; effracta repagula furvi

Di-

Ditis; & aternæ vobis data copia vitæ,  
 Ascendetis eò; vobis nihil ampliùs obstat.  
 Dum parat egressum proavorum turba; beatam  
 Exhalat Disinas animam, quæ ducta per umbras  
 Et loca muta, videt Divinos eminùs ignes;  
 Lætatur, Patrùmque choris sociata, potitur  
 Pollicitis. Tandem Jesus Dux inter amcenos  
 Et celebres plausus ingentia nomina Limbo  
 Educit; Stygii spoliùm memorabile regni!  
 Magnificum visu fuerit (sed talia nostri  
 Aspectùs aciem fugiunt) sub vindice diræ  
 Mortis & Inferni Jesu, tot millia Patrum  
 In certos distincta choros, certasque phalanges,  
 Ex Limbi tenebris Paradisi in pascua duci.  
 Nemo triumphantis laudet spectacula Romæ,  
 Ingressusque Ducum, devictis hostibus: illa  
 In nostræ nequeunt duci consortia pompæ  
 Festivique chori; quis enim Cœlestibus ausit  
 Æquiparare leves Mundi pereuntis honores.  
 Aspicit Infernus Patres exire profundo,  
 Hisque dari sedes vacuas, quibus antè superbus  
 Lucifer in patrio fuerat gavisus Olympo:  
 Rumpitur invidiâ plebs indignata profundi;  
 Tota furens, piceas rictu deglutit & efflat  
 Flammarum nubes; laniat sua viscera morsu.  
 Panditur intereà Paradisi nobilis hortus,  
 Ac recipit Patres; donec præeunte subintrent  
 Salvatore suo spatiosam Numinis Aulam,  
 Regalésque domos, & vasta palatia Cœli.  
 Multus ubique dies, lux perfectissima, veri  
 Visio clara Dei, Procerum pulcherrimus ordo,  
 Magna ministrorum series, immensa serenæ  
 Copia lætitiæ, votorum meta, quietis



Ac æternorum possessio plena bonorum!  
 Ite Patres, longos jussi sperare per annos;  
 Ite bonis fruitum Cœlestibus; ite salute  
 Perpetuâ saturi, quam vobis nulla deinceps  
 Eripiet Stygii Colubri versutia: nostrî,  
 Qui sumus innumeris, hoc donec in Orbe vagamur  
 Casibus expositi, memores estote, rogamus!

POESEOS SACRÆ ET PARTIS QUINTÆ  
 INDUCTIO SECUNDA.

S. LUCAS CAP. 24.

Unâ autem Sabbati, valde diluculò venerunt ad monumen-  
 tum, portantes quæ paraverant aromata: & invenerunt  
 lapidem revolutum à monumento. Et ingressæ non invene-  
 runt corpus Domini Jesu. Et factum est, dum mente conster-  
 natæ essent de isto, ecce duo viri steterunt secus illas in  
 veste fulgenti. Cùm timerent autem, & declinarent vultum  
 in terram, dixerunt ad illas: Quid quæritis? viventem cum  
 mortuis? non est hic, sed surrexit &c.

SYNOPSIS.

*Dominus & Salvator noster Jesus Christus, triduo post passio-  
 nem suam nondum elapso, à mortuis quàm gloriosissimè  
 resurgit; hujusque inauditi miraculi certissima per aliquot ap-  
 paritiones documenta, ipsorumque vigilum relationem, in maxi-  
 mam Judaorum confusionem manifestat.*

Post Christi mortem, nondum fax tertia plenam  
 Reddiderat Mundo lucem, rebusque colorem;  
 Ecce pavementum cryptæ fundusque sepulchri <sup>Matt.</sup>  
 Incipiunt trepidare; sacris penetralia fulgent <sup>28. 2.</sup>  
 Lucis inassuetæ radiis: speciosus amœno  
 Egreditur sponsus thalamo; latus omne ministris  
 Cingitur Angelicis. Vigiles terrore repleti  
 Aspiciunt facti seriem, & statione relictâ  
 Turpiter aufugiunt. Cum Christo læta resurgit  
 Albescitque dies; quando venerabile corpus

Am-